

leto una suplication di sier Bernardin Justinian qu. sier Marco, domanda di gratia sia suspenso li so' debiti a le Cazude per do anni: et cussi messeno di concederli *ut supra*; fu presa. Ave 163 di si, 22 di no.

Fu posto, per li diti, suspender li debiti di Domenego Cavali sanser dil Fontego di Todeschi, debitor di tanse per ducati 367 per do anni *ut supra*, et fu presa. Ave 164 di si, 16 di no etc.

Fu posto, per li Savii dil Consejo e Terra ferma, una letera a l'Orator nostro in corte zercha la cossa dei frati di Corizuola, notada in bona forma, soleciti il Papa a revocar il breve etc., et si lassi far justitia per esser cossa dil flisco. Tutti li signori è quelli la termenano loro, e tanto più, quelli frati ha comenzà il juditio di qui, e fato intrometer uno spazo di Quarantia a li Avogadori; con altre parole ben notade. Fu presa.

Fu posto, per li diti e li Savii ai Ordeni, una letera a l'Orator nostro in Spagna in risposta di soezà scrite, zercha adatar la cossa di dannificati a Napoli per via di composition; di ehe siamo contenti, et cussi havemo fato contentar a li dannificati, et sia restituito quel ha auto il flisco, et si satisfazi su l'intrada *ut in litteris*. Et in conformità si scrive a Hironimo Dedo secretario a Napoli. Fu presa.

Fu leto una letera, scritta per il Colegio eri mattina al Provedador di l'armada: come, inteso la morte dil Signor turco, si cussi lui averà de li, debi suspender il relassar di Synan rais e di le fuste. *Item*, non si movi lui, ma resti al governo di Provedador ancora.

Et sier Zuan Francesco Mocenigo savio ai ordeni, andò in renga, parlando che quella letera non piace al so' ordine, perchè quel suspender di la relaxation di Synan rais non è a proposito, per le raxon che 'l disse, et però li par si siegua le deliberation dil Consejo fate; et il Colegio non poteva suspender da loro. Et cussi venuto zoso, messe con li tre compagni soi, che la dita letera di eri sia revochada quanto al suspender la liberation di Synan rais etc., et il Provedador siegui la letera li fo scritto per avanti. Parloe sier Piero Contarini per la letera dil Colegio, dicendo quando di novo *emergunt*, di novo *indiget consilio*: e quando la fo ordinata, li Savii ai ordeni erano presenti, mostrando la letera sta ben. Et li rispose sier Marin Justinian savio ai ordeni, e ben. Et poi parlò sier Valerio Marzelo savio a Terra ferma, laudando aver scritto eri la letera, perchè fin 8 o 10 zorni si saperà dil Baylo di Costantinopoli qual cossa, e si terminerà meglio. Noto: sier Gasparo

Malipiero volse parlar in risposta dil Contarini; ma sier Marin Justinian lo fe' venir zoso. Hor li Savii messe star su la letera di eri: 2 non sincere, 3 di no, 91 di Savii ai ordeni, 99 di Savii altri, e questa fu presa.

Fu posto, per tutti sei Consieri, una parte di riconzar la parte fu presa in questo Consejo zercha il far di Avogadori extraordenari, quali elezer si debano per 4 man di eletion, stagino do anni, vengano in Pregadi, et non intrino poi a dinari. Et lo Marin Sanudo, è di la Zonta, andai in renga per contradir; et sier Alvise Baxadona Cao di XL, messe quello voleva persuader qualche uno metesse, *videlicet* revochar la parte di 8 di questo, e si stesse su la parte di 27 Zugno presa, che più non si avesse a far Avogadori extraordinari.

Io parlai e longamente e ben contra l'opinion di Consieri et contra l'opinion di la parte di far entri-no Ordinarii, laudando l'opinion dil Cao di XL, ancora che lo mi facesse tuor Avogador, qual officio desiderava summamente; ma più era il ben publico, che lo affecto privato. Avi benigna audientia. Et venuto zoso, sier Andrea Mudazo, sier Donà Marzelo, sier Marco Minio, sier Nicolò Venier consieri si remesseno di opinion e intrò col Cao di XL; ma sier Alvise Mocenigo el cavalier e sier Hironimo da Pexaro consieri steleno fermi su la opinion, et li Savii dil Consejo e Terra ferma messeno star su la parte di 8 di questo di far Extraordinari, et intrino poi Ordinarii. Et parloe sier Francesco Morexini savio a Terra ferma, contra quello parlai, et ringratiò il Consejo. Andò le tre opinion: nulla non sincera, 2 di no, 15 di do Consieri, 40 di Savii, 126 di quatro Consieri e Cao di XL, che è la mia opinion, e questa fu presa. La copia di la qual parte sarà qui avanti posta; sichè avi grandissimo honor per la prima renga ho fatta.

Et licentiat Pregadi, reslò Consejo di X con la Zonta, et preseno dar ducati 100 d'oro a Orsato di Francesco di Zamagno citadin raguseo, qual è venuto di la parte di la Signoria di Ragusi a portar di qua l'avisio di la morte dil Signor turco; et skriver una letera, ringratiando quella Signoria di aver avisato di le occorrentie, offerendosi etc.

Noto. Ozi in Pregadi, fo leto una *letera di Crema, di sier Andrea Foscolo podestà et capitano, di 30*. Zercha quelle fabriche, e aver fato far la description di la spesa anderà per serar le mura di la terra, qual stà mal cussi, qual sarà ducati 8000. *Item*, quanto a far cavalchar zente per seguration di la fiera si fa de li, scrive averlo fato, e ha auto